

明·朱國楨撰

明崇禎間原刊本

皇

明

史

概
(六)

大漢出版社
有限公司印行

明·朱國禎撰

明崇禎間原刊本

皇明史概
(六)

文藻出版社
有限公司
印行

皇明大訓記卷之九

臣朱國禎輯

洪武十九年正月己巳

上與侍臣論治道曰治民猶

治水治水者順其性治民者順其情人情莫不好生
惡死當省刑罰息干戈以保之莫不厭貧喜富當重
農時薄賦歛以厚之莫不好佚惡勞當簡興作節徭
役以安之若使之不以其時用之不以其道但抑之
以威迫之以力強其所不欲而求其服從是猶激水
過鰓非其性也

○二月己丑

上坐東宮與侍臣論仁智

上曰聖人

篤於仁賢者不舞智若姑息之仁不爲愛物姦欺之
智足以禍身又論天人相與之際 上曰天人之理
無二人當以心爲天論儉 上曰不可儉者祭祀然
祭不可瀆不可儉者賞賚然賞不可濫

○三月戊午諭戶部曰善理財者不病民以利官必生
財以阜民前代理財竊名之臣皆罔知此道謂生財
裕國惟事剝削蠹蝕窮錨銖之利生事要功如桑弘
羊之商販揚炎之兩稅自謂能盡理財之術殊不知
得財有限而傷民無窮我國家賦稅已有定制樽節
用度自有餘饒減省徭役使農不廢耕女不廢織厚

本抑末使游惰皆盡力田畝則爲者疾而食者寡自然家給人足積蓄富盛爾戶部政當究心毋爲聚斂以傷國體

○四月丁亥遣御史蔡新給事中宮俊往河南檢察被水人民有賑濟不及者補給之諭曰民之被水旱者朝夕待哺已道人賑濟庶恐有司奉行不至有賑濟不及者不得粒食顯於災區深用閔念特命爾往彼覈實有未賑濟者卽補給之又曰君之養民如保赤子恒念其饑寒爲之衣食故曰元后作民父母爾等其體朕至懷

○吏部奏用國子監十四人皆爲六品以下官諭曰事君之道惟盡忠不欺治民之道惟至公無蔽凡一郡一邑之民必有饑寒不得其所者有獄訟冤抑者有貧者不舉者有豪猾蠹民者汝等到任能不爲私欲所蔽人言所惑則方寸自明而諸弊可息一牽於私欲而惑於人言則冥然無所知知識饑寒者無繇獲濟冤抑者無繇伸理賢才壅蔽而豪猾縱橫其爲廢職甚矣古人有言人始入官如入暗室久而乃明明乃治汝等切記之毋爲人蔽惑也

○六月甲辰詔天下同昔元末播蕩海內憂兵所在黔

黎苦殃甚矣如此者一紀有奇朕命將削平民得粗安天下大明今十有九年矣然奸臣在位謀間臣民恩本施而弗及德將布而沮行政乖理悖莫甚於此先王之道未究於行失存問於高年及矜恤於鰥寡孤獨去歲大誥頒行民從朕命至奸擾吾民者懲治而歛跡進士監生職任於諸司想吾民樂生有漸矣今特命有司存問賑恤必得其所所有合行事宜條列依欵行之

○七月癸未詔舉經明行修練達時務之士年七十以下者郡縣禮送京師因諭禮部郎中鄭居貞曰古之

老者雖不任以政至於咨詢謀謨則老者閱歷多而見聞廣達於人情周於物理有可資者居貞對曰人至六十精力衰耗則不能勝事請六十以上者不遣上曰正爲有司不體朕意士耆年都置不錄豈知老成古人所重文王用呂尚而興穆公不聽蹇叔而敗伏生雖老猶足傳經豈可槩以耄而棄之若年六十以上七十以下者當置翰林備顧問四十以上六十以下者於六部及布政司按察司用之

○八月乙酉上覽宋史見太宗改封樞庫爲內藏庫顧謂侍臣曰人君以四海爲家因天下之財供天下

之用何有公私之別太宗宋之賢君亦復如此他如漢靈帝之西園唐德宗之瓊林大盈庫不必深責也宋自乾德開寶以來有司計度所缺者必藉其數以貸於內藏俟課賦有餘則償之凡有司用度乃國家經費何以貸爲缺而許貸貸而復償是猶爲商賈者自與其家較量出入及內藏旣盈乃以牙籤別名其物叅驗帳籍晚年出籤示真宗曰善保此足矣貽謀如此何足爲訓書曰慎厥終惟其始太宗首開私財之端及其後世困於兵革三司財帛耗竭而內藏積而不發間有發緡錢數十萬以佐軍資便以爲能行

其所難皆繇太宗不能善始故也

○九月庚申西平侯沐英奏雲南土地甚廣而麓蕪居多宜置屯令軍士開耕以備儲蓄 上諭戶部曰屯田之政可以紓民力足兵食邊方之計莫善於此趙克國始屯金城而儲蓄充實漢享其利後之有天下者亦莫能廢英之是謀可謂盡心有志古人宜如所請然邊地久荒榛莽蔽翳用力實難須緩其歲輸之粟使彼樂于耕作數年之後徵之可也

○十二月戊申左都御史唐徽上言 陛下之於刑獄每存欽恤之意蓋欲期於無刑而頑民狎玩犯者不

止臣愚以爲莫若嚴刑以制之使知所畏而重犯法
上曰刑不可使縱弛亦不可使過嚴縱弛則爲惡者
無所畏過嚴則爲善者或濫及用刑之道但貴得中
則刑清失中則刑亂刑亂而政衰矣如爾所言恐流
於濫其可哉

洪武二十年正月己未詔修闕里孔子廟宇 上曰春
秋之世人紀廢壞孔子以至聖之資刪述六經使先
王之道晦而復明萬世永賴功莫大焉夫食粟則思
樹藝之先衣帛則思蠶繅之始皆重其所出也孔子
之功與天地並立故朕命天下通祀以致崇報之意

而闕里又啓聖降神之地廟宇廢而不修將何以妥
神靈詔來世爾工部其卽爲修理以副朕懷

○甲子大祀天地于南郊禮成天氣清明 聖情悅豫

侍臣進曰此 陛下敬天之誠所致 上曰所謂敬

天者不獨嚴而有禮當有其實天以子民之任付於
君爲君者欲求事天先必恤民恤民者事天之實也
卽如國家命人任守令之事若不能福民則是棄君
之命不敬孰大焉又曰爲人君者父天母地子民此
職分之所當盡祀天地非祈福於已也寔爲天下蒼
生也

○丙子府軍前衛老較丁成言河南陝州地有上綾下綾上黃塘下黃塘者舊產銀礦前代皆嘗採取歲收其課今錮閉已久若復採之可資國用上謂侍臣曰君子好義小人好利好義者以利民爲心好利者以戕民爲務凡言利之人皆戕民之賊也朕嘗聞故元時江西豐城之民告官採金其初歲額猶足東辦經久民力消耗一州之民卒受其害蓋土地所產有時而窮民歲課成額徵取無已有司貪爲己功不以言朝廷縱有恤民之心而不能知此可以爲戕豈宜効之

○二月己未躬耕籍田遣官享先農禮成宴羣臣于壇
所上曰耕籍田古禮也一以供粢盛一以勸農務
本也朕卽位以來恒舉行之惟欲使民知勸盡力田
畝遂其生養非事虛文也今禮成與爾等享胙于此
豈徒爲宴飲之樂正欲羣臣知重農之意耳

○甲辰御註書洪範成上嘗命儒臣書洪範揭於御
座之右朝夕觀覽乃自爲註至是註成召贊善劉三
吾曰朕觀洪範一篇帝王爲治之要道也所以叙彞
倫立皇極保萬民敘四時成百穀本於天道而驗於
人事箕子爲武王陳之武王猶自謙曰五帝之道吾

未能焉朕每爲惕然遂疏其旨爲註朝夕省覽三吾
對曰陛下畱心是書上明聖道下福生民爲萬世
開太平者也

○甲戌雲南左布政使張統秩滿來朝上以統在雲
南能撫綏夷人俾復職賜璽書勞曰唐虞之制外樹
州牧侯伯式奠民居以寧方域人樂雍熙載諸嘉策
雖不備述而紀綱見焉是時英良並出所用惟仁是
以世代相承而法令不更諸侯列土千載不異以其
誠信相孚上下無間也今之人不然遵善弗從縱欲
如流朕竭氣力疲精神諄諄諭之從者罕焉何其難

治也曩者討平西南諸夷命官撫守爾統實先授任
今五年矣言出則諸蠻聽服令布則四野歡忻皆繇
誠信相孚克共乃職奠安黔南人獲其所今年來朝
不待考而朕知其功出乎天下十二牧之首故嘉汝
績復命仍治黔南汝往欽哉

○四月丙申有國子生初任陝西知縣人告其嘗受民
財刑部逮問 上謂之曰所難得者爵祿所易得者
貨賄難得者守之則獲福易得者溺之則受禍爾以
書生受民社之寄古稱郎官出宰百里上應列宿誠
難得也苟能思其所難得而保之豈特爲一身之福

施及父母妻子其福莫大焉乃不能廉潔以律已受
污辱之名以爲父母羞朕念爾年少更事未多特宥
還職爾其改過自新力行爲善庶有立於將來

○巳酉左都御史詹徽奏有軍人犯罪當杖其人嘗兩
得罪幸宥免矣今復不悛信非良善宜併論前罪誅
之以懲餘者 上曰前罪旣宥今復論之則不信矣
用刑而不信使人何所措手足且其罪至死而縱之
則爲縱惡不至死而誅之則爲濫刑今罪未至于死
而輒欲殺之在爾有故入之罪在朕無恤刑之仁皆
不可也仍杖而遣之